



## Editorial

### GINGTU HINKHUA

(Bible : Luka 9:62).

Kochuam hin a ki-upkhumna sung bep hih huaplo in, ziakhel lam ah chun le ahup lian ma ma hi. Kochuam sunga kivaipuakna lamte, thawlawm thute leh Biakna thute bep leh missionary chawp lam bep hih huap pua, Kochuam pawlam ah gingtute hinkhua zosia le a huap ahi. A pawimawpen chu Kochuam ah gingtute hinkhua hi ahi. Gingtute'n mimal hinkhua I mat danteu ahin Pathian leh Kochuam dawidan ahina em, ti hi I ngaitua zing a pawimaw hi. Gingtu hinkhua a chun nek leh dawn thute, kichei dante leh nisin ah nek leh chak hawlina ah I sepdanteu ah thiangthona a pawimaw ahi. Zia chu Pathian thu tawh le kituak pen hiding ahi.

Pathian hi a thiangtho ah, I hui. a Kochuamte ngei hile thiangtho dingin a daw i a, Thuthunglui hun lai apat in thiangthona hi a gen nasa ma ma hi. Thuthungthak hun inle gingtu hinkhua ah taksa thi-angthona bep hilo in lungthim ah le thiangtho taka gingtu hinkhua mang dinga gingtute a daw i thu I mu'u ahi. Ziakiakachun, gingtute'n I mimal hinkhua'u ah a thi-ang leh thianglo I khendan ua hin Bible tawh kituaka hinkhua I mat uh chun I gingtu hinkhua chu ma-sawn jel ding ahi. Chun, Khrista'n ei dawinate chu supitingtu hiding

I hui. Gingtu hinkhua thiangtho taka I mattheina dingun tamlo cha vak en suk hitiu:

#### **Mimal kipiakdawna:**

Bible ah chanchinpha Bu ahin Lal Jesu'n vangam lut theina ding dan chuam chuam a gente I mu. Van gam lut theina ding chu Thagau lam thil ahi lai in mimal hinna lampang in, gingtu hinkhua ah bawlding agen a um hi. Jesu Khrista hukdamtu dinga pawmlo leh piangthaklote chu Kochuam ah chun minkhum maleu Kochuam ah gingtu member suan um leh

muan um chu a hi ngai ngai puau.

Gingtu hinkhua diktaka mat ahi theina dinga chun ko-chuam ah min khumna mai kha ahipua, titakzet ah kipaiakna kha ahizaw'i. Gingtu tamtakte'n zialaitak hih ahi l buaina pen chu! A thu ah genthiam mai leh Biakin sung ah valim leh lam mai ahin l lungawi zotau a, Biakin pawlam ah l hinkhaw matdan uh buaipi kham leh ngaitua zui ngai ma ma ki um thei ahi.

**Nek leh dawn ah thiangthona:**

Bible in nek papna leh zu duna, zia khawvel damsung ngai-tuanate ah kisubuaילו ding leh zia mite chun Pathian gam lualo ding ahidan uh ei hil a (Lk.21:34. l Kor. 6:10). Gingtute'n le Zu leh dam-dawi khamtheite, chep leh mua-mte leh, l taksa sukhawlo theite laka kisum ding ahidan l hetsau ahi. Ahiziakin, gingtute'n zia thu hi l ngaisaklo pen uh a bang hi. l taksa hi Pathian In ahia, khamthei thil ah l sukkhawlo chun Pathian In ei sukhawlo ding ahidan Bible ah l mu'u ahi (lKor.3:16). Gingtute'n thiangthona hinkhua hi l ngaitua thak dinga thilpha tak chu ahi.

**Gingtute kicheina lam ah:**

Kicheina lam ahin a hun bepcha hiat hi thil phatak ahi.

Eima tawh kiphutawk a thiangtho leh feltaka kichei ding ahi. Cha-po tak leh sual ah ei puikawi thei ding lam ahem ah kichei ding ahi puai. Eima ut dan dan ah kicheina hin l Kochuam chanpite a ding tiang ale zachat umtak ahisek hi. Biakin sunga kichei dan hiat an-gai a, zia gual ah chun a hun leh mun tawh kituaka kicheina hi hi-atthiam a pawimaw hi. Bible inle gingtute kicheina ding thu ei gen hi (l Tim.2:10. l Pet. 5:3:2).

**Nasepna lam ah:**

Gingtute'n eima nasep-na chiata ginum tak leh taimatak a l sep chiat ding uh ahi. Bible in kithadana hi a dem ahi. Govern-ment ah nasemtu l hem, ahiloleh khut nasep a nek hawl hiziang leu hin le ginum taka l sepding uh chu gingtute hiding him chu ahi. Kochuam mi diktak chu a thabei ding ahi puai. A mawpuaknate chu kitup tak leh fel taka a sep ding ahi. Sepna hih l nek hawl na le ahin, kitup tak leh feltaka l sep ding him ahi. Nek hawl na ziaka sepna chu a zachat um ah ngailo ding ahi. l sepna ah chu Pathian lau kawm ah l sepzawk ding ahi.

**Gentheipi ngam a ngai hi:**

Khristiante hi bangkim ah Pathian thu tawh kituak taka

hing ding in Bible in ei daw-ite chu l hui. *“La um dan tawh Khrista chanchinpha chu kituak hen”*(Phil.1:17) ti ahi. Hinkhua ah chanchinpha tawh kituaka hinda dingin a man piak a ngai a, zia dinga chun kineppite l hui hi.. Ahiziakin, tulai in chanchinpha ziaka gentheina chu ngawluai leh bangmalo in l ngaitua tau a, eimau damsung nawpsakna ding zawkte l buaipei’u a, chanchinpha thu chu l ngaitua nuam ta puau.

Hinkhua ah nawpsakna ding ahi phawt chun nekgukna, gawlgukna leh chanchinpha tawh kituaklo bawl chu khawksak in l nei puau. A langkhat lama zia gual bawl mite chu Kochuam ah kipezo mi leh thawlawm piakna lam in le a tawmngai ma ma sek ui. Ahiziakin, Khristian hinkhua a dingin zia gual chia dante chu dikzolo leh gingtu hinkhua thi-angtho hilo ding ahi. Pathian a dinga kipiaklo ding lam chu l genna ahipua, chanchinpha tawh kituak in kalsuanzaw’i tiu tichu l gennawp ahi.

### **Gitlona do ding ahi:**

Tulai Kochuam sunga l mi-maltin hindanteu chu atamzaw l kihet chian chiat uh gingchak a um hi. Ahiziakin, kuama a kigen-

tua nuam leh kihiltua nuam a ki-um tapuai. Zia dinmun ahin Paul in Galatia mite kianga *“hepina’n na kiseptua piak chiat un”*(5:13) leh *“nangma la ki hepi gual in la vente la hepi ding ahi”* (5:14) ati thu hi gingtute’n nuizat um ah ngai l bangjo tau. Kochuam ah chun gingtu hawitak guala kilang, himaleh gitlona bawltu hizing, ahiziaka a gitlona chu a dotu ale pang zing tho l hisek ui. Gingtute’n gitlona chu hangsan takmai ah l do ngam ding uh ahi. Zia gual ah pang ngamte chu ahi ging hinkhua mangdikte chu.

Awleh! l Khristian hinkhua’u hi diklona chuam chuam in ala mang kha maleu hin pangthak lakit in, khangthakte’n ei ettawn uh lamdik ahung zui theina ding un panthak lakit hitiu.

--o0o--

# PATHIAN KIANG AH THIL I PIAKNA ZIAK LEH I PIAK DING DAN

**Deut 14:22; Mat 6:1-4; 2Kor 9:6-9.**

By: Rev. Seilunlal Vaiphei.

Gingtu hinkhua ahin i thil mu leh chan teu hi Pathian apat ahi dan imu dawk thei ui. Zia i thil mu leh chan teu kha ei petu hemil khawp ah eimau ut na lam lam ah mawk mat ziang thei ahi puai. A neitu lopina ahi zia kin hawp gual dan thiam angai hi. Eima mimal kiphalna chau in thil ahi thei puca, bangkim chung ah vaihawmtu dawi gual lungthim ngaituana nei a paw i maw zawi.

Anuai ahin Pathian kiang ah thil i piakna ziate tamlo chan ala en khawm hitiu.

**i) Pathian thupiak ahi:** Thuthunglui hun ah thilpiak chungchang i mu'u hi kizilsakna sangin thupiak lam ahi zawi. Zia thupiak zui chu Pathian kipakna lam ahi zawi. Zia gual chu ahi zia kin i thilpiakteu hi Lalpa kiang ah piak ahi.

**ii) I thil piak te'u hi mamawna um ah piak ahi:** kochuam in Lalgam Na i senate, semtu i chawpnate'u ah mat ahi sek hi. Zia bep chu hilo in vangsiatna leh haksatna tuakte sawmdawl na ding ah piak ahi sek hi. Khawvel ah Kochuam a um sung ahin a mite thilpiak mang ah a gam tundin leh suklet zel hi Pathian thiltup ahi.

**iii) Pathian chu bangkim neitu leh ei petu ahi zia kin i piak thuk ding uh ahi:** 1 Khangthu 29:14 na chun "bangkim hi nangma ah kipat hung pawt ngen ahi'n, nang a ma ma chu ka hun piak kit uh ahi zawi" ati gual ahin, pia ding ah thupiak a um nunga pelo chun "Pathian a suam" ahi (Mal 3:8). Bible a hin i piak zia k a malzawl na dawng ding ihi zia'u i mu thei hi.

**iv) Thagau lam suklatna ahi zia k in piak thuk a ngai ahi:** Pathian i hepi hi ti etsakna'n a kiang ah piak thuk a ngai a, hepina panglo in thilpiak thei himaleh hepitu chun a pelo thei puai. Pathian i hepi taklatna chu i piak thuk kitna hin ahi(Lk 19:8ff; 1Jn 3:17). Mal 3:10

Pathian in“ ka inn ah nek ding a umtheina ding in bu inn ah hung kawikhawm un; tichun, ka van tukvante hawng in, a kawina’n a dawl lo ding khawp malzawlna’n ka hun vuk paw na ve em, ti ei patep ma tiam un” ala ti hial hi.

Anuai ahin i thil piak ding dan vak en kit hitiu.

**i) Lim leh thanuam tak a piak ding ahi:**

Israelte chu lungthim ah kiphah tak ah pe ding ah hil a hi’u(Exo 25:2). Korinth Kochuamte chu “phallo sa sa, pawng changsan ah piaklo theilo guala ngai ah” pelo ding ah jil ahiv hi. “Pathian chun lim takah piatute a hepi hi” ti’n sawlchak Paulin a zilsak hi(2Kor 9:7). Ziagual a chun i piak theina dingun Pathian in Jesu Krista ah hukdamna lopitak ei siampiak hi.

**ii) Um zia nei leh mumal tak a piak ding a hi:**

I tuak lemchang leh lungthim ah a kilat dan ah piak ziang ding hilo in, piak ding dan leh piak hunte mumal tak a nei a phai. 2kor 16:2 a chun hunbi nei ah piak ding thu i mui. Thatnawp hun ah pia, thatda hun ah piaklo mai hi bawllod in apha. Bangtik lai inle Path-

ian nasep dinga um zing ah, panpi ngai le a bei diak puai. Ziaziakchun, kochuamin hunbi a guatte zawm ah, fel tak ah piak a phapen hi.

**iii) I hekna kham piak ding ahi:**

Mi khen khat chun Pathian chun tum i piak leh ahun hi ti ngaitua na nei in thawlawm dang him him ngaisak talo aki um in zia chu Pathian lunglam hikhel puanna. I thilpiak tam lam sangin i piak bang, i nei naklai in Pathian a ding ah i kiphahna a taklang hi. Meithainu thilpiak kha tawmcha himaleh Jesu’n a petam pen hi ati. A ziak chu midante khan a nei val uh a piau ah, a man vang a nei sun sun a pia ahi. Piak bangkhai nei talo ahi. Ei lampang sukhalo in tamtak le a piak thei ah, himaleh Pathian chun malsawmna i dawn apat i piak phal dan a patin ei te sek hi.

**iv) Kingaitawmtak leh chapona panglo ah piak ding ahi:**

Pakchat ut ziak ahem, kinepna nei ah thilpiak chu Jesu’n a dawilo ma ma ahi. Zia gual a pete chun “Alawman uh chu a muzo ta’u” a ti’i(Mat 6:2). Pathian in bangkim ei pia, ama i pekit mai ahi ti hia’n kingaitawm leh

lawkpina ding ngaitua loin pe lehin piakdan dik chu hi ding ahi.

**Thukhakna:** Thawlawm a tam chun Pathian a ding ah nasepna ding a tam hi tina a hia, a pawimaw him ahi. A petu lamah chun a piak tam leh tawm sangin a piakna lungthim a pawimaw zawi. Meithainu thawlawm chungchang ah khan, a piak tam leh piak tawm sangin a lungthim kha Jesu'n pakchat chu ahi(Mk

12:41). Piakna lungthim a thiantho ah a dik chun a tampete le pakchat ding ahi. Piakna lungthim a thiantho nak chun tawmcha le Pathian kipakna ahi tho tho hi. Gam liantak nei ngal a mang phachuamlo a um thei a, i gam neite'u hi thaichi leh thei chi chuam chuam ching in, pha tak ah enkawl in lawk takin i mang phachuamna'u em ti hi dawtna pawimaw taka hi.

--o0o--

*Tumbakni(Palm Sunday)*

## **Lalpa'n a dawina a um hi.**

**Bible: Marka 11: 1- 10.**

*~Rev. S.T. Kaia Vaiphei*

*Exe. Secy. KSP*

### **Thumapui:**

**P**alm Sunday mang thei ding ah hun pha leh damna ei petu Pathian chu lopina chang ta hen. Chun kochuam mipite zosia Lalpa Jesu min in Palm Sunday chibai ka hun buk hi. Jesu lei ah kum 30 a leng a, Bible ah kizik dan dungzui in nasepna (ministry) a nei hun sung chu kum thum vel bep ahi. A hun nunung lam in chawihawi in a um a, Jerusalem in lopitak in a lut ahi. Zia ni hi Palm Sunday I tiu ahi.

### **Palm Sunday Umzia:**

Palm Sunday ti hi ei pau ah tumbak Pathian ni ti sang in le I ha hiat zawu ahi. Sappau ah Palm tree ti hi tum thing ahi. Chun Lusu gamlak ah um, a ling nei, a baal nek chi hi le palm kiti tho ahi. Bang ziak ah Palm Sunday I tiu a hem I ti chun Jesu lopitak ah chawihawina tawh Jerusalem ah a lut ni chun mite'n Jesu chiana ding a chun a puanteu a phau a, puan pha ding neilote'n tumbakna a sat ua; a phau a, zia ni chu Pathian ni ahi ziak in "Tumbak Pathian Ni" ti ahi.

### **Jesu Matchak Sabiltung No:**

Jesu chun lopitak ah Jerusalem a lutna ding a chun Jeep

leh car a um nai lo tawp in le sakawl bek mang leh kilawm tak, gancha musit um tak sabiltung no chu mang in Jerusalem a lut ahi. Zia chun kingaitawmna a et-sak a, zawlnei chun, "Entia! La lal chu kingaitawm tak in sabiltung chung ah chuang in a hung hi; sabiltung no chung ngei a chun," tia a la gen sa ahi. Jesu chuanna sabiltung hi sabiltung naran le ahi pua; a no hinalai ahi. Sabiltung hi gancha musit um tak leh ngawl tak ahia, kawlte chun gadha a tiu a, kawlten mi 'gadha' a tiu chun kimusitna tawp khawk ahi tai.

Bang a ti leh zia gual gancha musit um tak chu Jesu a mat ahi diam ti hin kaw ch-

uam chuam a nei thei ahi. Judate dan a chun Judate chu galdo ding ah a kuandaw phat tak ua leh sakawl chung ah chuam in a kuan sek ua, maleh gal zo ah innlam a hung kilekit tak ua leh sakawl hi lo in sabiltung chung ah chuam in kingaitawm tak in a hung kilekit sek uh ahi. Ziaziakchun Jesun lopitak ah Jerusalem a lut a; sabiltung no chung ah a chuan hin zawna a etsak ahi. Zawna chang ah van lam a kile kit a etsak ahi. Upaten 'nem in gual a zo hi' ati gual un khawvel ah a um sung in nikhat ziang le kipakna ding leh lopina leh chawisan-na ding nei lo in a hungna ziak pipen mihingte hukdamna na chu kingaitawmna leh kineu sakna in a zo ahi ti hi kross ah a thawk masang in a etsak ahi.

### **Kuama Chuan Khaklona:**

Jesun a chuanna ding a chun kuama chuan khaklona khel khel a ti ahi. Ziaziakchun sabil-tung chu a lian hileh mi kua a hem khat to a la chuam kha ta mai thei ahi. A tangpi in vang sabil-tung chu van puakna kimang sek ahi. A puak a gik leh chia hat deu deu ziang chi ahi. Thagau lam ah etsakna ding a chun I puak uh hi a gik ta lua, I lunggil ua chuam hi a

tam ta lua, Jesu chuanna ding in mun a awng lo ahi. I thinlung uh hi sum ngainatna, hausak nawpna, nawpchenna, lalna ngainatna, thuneina ngainatna, pha kisakna, he kisakna, thiam kisakna zosia hin a lua dim taak ziak in Jesu chuanna ding in mun a um ta puai. No tui dimsa a hin bang zat tui I sun leh le a dim sa thei chuam diak ta pua, a lêt zak tho tho sek ahi. I thinlung ah phatlona chi chuam chuam in a lua dimna mun a hin Jesu a chuam thei pua, ziate chuan khaklona, bangmachan a lua lona mun a chun Jesu a cheng nuam ahi.

### **Lampi Puan leh Tumbak Pha:**

Sabiltung gancho musit um tak chawt ding a chun miten a puanteu a phau a, puan nei-loten tumbak a sat ua a phau ahi. Tichun Bethphage a pat Jerusalem tempul tiang chu a phatung kei uh ahi.

Bang ziak ah zia gancho musit um chawt den ding a chun miten a puanteu, nasawlte a phau ahi diam? Sabiltung no ziak chu ahi pua, sabiltung no chung ah chuam pa Jesu ziak chu ahi zawi. Nang leh kei hi mimawl, mi chaga, hatlo leh musit um tak le I hi mai thei hi. Maleh Jesu I nei



chun mite ngaisan leh een um l hi sek hi. Zia Jesu zal a chun thil lopi tak tak te l bawl dawk a, l chan ding ah kilawm lo leh l phu lo malzawlna leh dinmun ahten langkai l hi sek hi. Zia chu David in a kihatchian ma ma, “Aw Lalpa; kei hi kua ka hia, ka insung mite le kua a hiu a, zia chan tiang tiang hi lei pui ahem” a ti ahi.

Hosanna: Jesu lopitak ah Jerusalem a lut a, a nungzui mipiten a sap uh thumal (Slogan) chu ‘Hosanna; Lalpa min ah hungte chu a vangphau’ ti hi ahi. Hosanna ti umzia chu ‘chawihawi in um hen’ tina leh ‘hukdam kin in’ tina ahi gel gel hi. ‘Chawihawi in um hen’ ti hi pawlam ah a kilatna hia, chun kross ah khenden ahi ding hi le pan a chawina ding chu ahi. A sunggil lam a chun mipi hosanna ti samte chun a kihiat lo vang un ‘mihingte hi gitlo thina a pat hukdam kin in’ a tinau ahi.

Chun langkhat lam in Jerusalem ah chawihawi ah a um ni mipi a nung zui ah kipak tak ah hosanna tia sam ah kikote hi ni 5 zaw ah Jesu khetden ah a um ding ni a chun Pilate in dawtna a bawl ah kua hem ka thadaw piak ding, Barabba ahem Jesu Khrista? a ti lai in Barabba chu tha-

dawk in tite kha a hiu. Pilate ma chun a leh Jesu Khrista hi bang ka law diam; tia a dawt lai in kross ah khenden in, a thisan phuba chu kei leh ka chateu chung in chu hen, tia kikote kha ahi kit tau.

Unaute haw, Christmas ni, kumthak ni, khawmpi ni leh khristiante kikhawp khawm ni ahte chun Jesu chawihawi in Haleluiah tin l kiko sek a, haksatna ding mun leh eima lawkna ding mun ah l um tak leh Jesu sumelsiatu in l pang sek tau ahi. Ginum tak ah ama zui zing ding in la kitiam ngam diam?

**11:4 Lalpan a dawina a um hi:** Min sabiltung chu bang ding ah la thap uh ahem tia a hun dawt uh ahi chun “Lalpan a dawina a um hi; ti leu chin hun pe ziang ding ahi,” ti hi ka lungthim ei khawi ma ma chu ahi. Pathian in a gam nasepna ding leh ama zui ding in mimawl musit um takte le ei daw i ahi. Bang zia k ah kei pen tak ei matchak nawp ahi diam l tina ding tamtak a um sek hi. Pathian in a gam nasepna ding leh a malzawlna dawng ding in mi zosia hi ei dawisak vek a, a thiamte le a thiam dan dungzui un a mang nuam a, a hau leh vai, a mawlte le ei mang nuam vek

ahi. Paul in ‘Pathian thilhitheina chu ka chung ah a kilat theina ding in ka hatlonate cha cha hi suang zaw tang ka’ a ti gual in Lalpan a nasem ding in khawvel ah mi hausu, mi pil, mi thiam zia zat um lai ah nang leh kei ei dawi hi dawisakna liantak I chan ahi tawh kitawn in I hatlonate hi ama thilhitheina kilatna ding in ei mangcha nuam ahi.

Unaute haw, a chang leh I chung ah thil tungte hi I hiatthiam thei keei lo, bang ka sukkhial a um ah ahi dia aw! Bang ziak ah zia gual thil hi ka chung ah tung ahi diam tina ding tamtak I nei sek ahi. Sam in David chun “Nang in pha la sak dan dan in ei pui in la tin, a nung tak leh lopina

ei la lawp ding la hi” a ti gual in I chung ah thil tung tamtakte hi ei a ding ah a pha zaw a la hi sek a, sapte chun, “Blessing in disguise” a tiu a, zia chu I chung ah thil tung I hiatthiam thei lo khenkhat te hi ei a ding ah siatna, manthaina leh Pathian gawtna ahi tam I ti lai in Jeff Akai la sak gual in ‘ei a ding ah phazaw leh malzawlna a la hi sek hi.’

*Lalpan a thu a thak in I chan  
chiat ding un ei malzawl ta hen,  
Amen.*

--o0o--

*Good Friday Message*

## **Khros chung ah Jesu thugen Sagite**

*~Revd. Dr. Hangpi Manlun*

### **Thupatna:**

Khawvel ah mi tam takte'n a thi dingkuan phat ua le a hinkhua chiasate'u a nung gel kit sek u'i. Zia bana chun, a insung mite leh a lawite kiang un vaithakna thute a genjel u'i. Ziaguala chun, Jesu kha le taksa ah hung piang in, za ah za Pathian hina leh mihing hina nei in zia khawvel ah hin a hung a, chuleh a thikuan in Khross chung ah thugen/kampau sagi a gen hi. Ziate chu "Khross chung ah Jesu thugen Sagite" akiti ahi. Zia chu vak ngaitua khawm hitiu.

### **1). Hepa, Amau hi Ngaidam in, a thil hiu a hetlo ziaq uh ahi (Luk. 23: 34).**

Lalpa Jesu kha migilote a ding a hukdamna lampi a bawlpiak theina ding in, Khros ah khetden in a hung um ahi. Khross bul in mipite leh sepaite'n tawtbawlina'n a nei ua, zu thuk a pia'u ua, chuleh a kiang in tihin a gen u'i. "Judate lengpa la hi leh, Nang leh Nang kihukdam in!" (Luk 23:37). Ziaban ah a kiang ah migilo khendente lak ah khat in le a hose nalai a, tihin a gen hi, "Khrista hilo la hia hem? Nang leh nang kihukdam inla kei uh le ei hung hukdam in!" (Luk 23:39). Lalpa Jesu'n amau ading in a pauchap piak ahi. Jesu'n Pathian

kiang ah a gitlonau ngaidamna ding a kikhenden ahilam helote a dingin hepina leh ngaidamna a dawt piak ahi. Amau in a thil-bawl uh gitlona/sual ahi ti helo ahi maithei u'i.

A lungsiatna banggual lawm lawm a thuk leh thupi ahi-tam? Jesu chu Pathian bangkim bawlthei tawh pumkhat ahiu a, a ut leh le Khross apat in bail-amtaka hung kum in A suakcha thei ahi. Himaleh, Pathian dawina gualin hukdamna dinga kig-uat a sukbutin theina dingin khenden in a um ahi. Ziakiachun, Ama'n sukgentheina leh jachatna tincheng a thukzo a, lungsiatna liantak tawh a pauchap piak a, chuleh ngaidamna adawt piak

nalai hi. Ziataka, “amau” kiti hin Ama khendente leh tawtbawlna mangtute chau a kaw k pua, mi kua hileleh Jesu Khrist pawmlo zosia leh thimnuai ah chengte zosia le a kaw hi. Chuleh Jesu’n Khross ah a thugen masapen kipat in Pathian dawidan bang ahi em ti leh Khristian lungthim put ding dan ei hil ahi. Matthai 5:44 ah, hitin a ati ahi, “Himalehle ka hung hil ahi, la melmate hepi inla chuleh nang hung sugentheite a ding in pauchap in.” Ziaziakachun, ei sugentheitute zosia a dinga i pauchap thei ding uh ahi.

## **2). Tuni hin Paradis ah ka kiang ah um ding la hi (Luk 23:43).**

Jesu kha Golgotha, “Lugu mun” a khaikang ahilain migilo pani le Ama tawh khetden ahiu ahi. (Luk. 23:33). Migilote laka khatpen in A kiang ah simmaw takin a ho a. Himanlehle a khat pen pa’n migilo, simmaw taka hosepa chu a gai a, ama gitlonate a kisik a, chuleh Jesu hukdampa in a pawm ta ahi. Tichun, Jesu’n Paradise ah Ama tawh umkham ding ahi thu a tiam piak tai. Paradise chu Abraham angsung ahi ti’n Jesu’n a gen hi. Chuleh Thuthunglui hun lai a mithiangtho

thimasatei thagau umna mun ban ah Paul in van thumna um gual in a gen hi. (Ephesa 4:8-10). Jesu’n Ama kha Messiah misualte a kisik phat ua le ngaidam thei leh Khross a, A thugen nina kipat ah hukdamtu ahidan a puangdaw k hi.

## **3). Numei, La Chapa Kha En In: En in la nu kha.**

Ziaziakachun, Jesu’n a nu leh, nungjuite a a hepi kha a kiang ah ding a mu’n, a nu kiang in, “Numei, la chapa kha en in!” a ati ahi. Tichun, nungzuipa kiang ah, “En in la nu kha!” ati hi. Bible i et le, Jesu’n “nu” a ti puai. Et-sakna dingin, Johan 2:1-11 sung ah, Jesu’n a nasepna apat nunga tui uain a suak sak a thilmak masapen a bawl hi. Zia thilmak kha Galilee ah Kana khua ah kichenna hun thiltung ahi. Jesu leh nungjuite le chial in a um u’i. Uain a hung bei phat in, Mari’n a kiangin, “Uain a nei ta puau,” a ti hi. A ziakchu Jesu kha Pathian chapa ahi leh tui Uain a suaksak thei hi ti a he ahi. Jesu’n a kiang in tihin a gen hi, “ Numei, nang leh kei kisaklana ding bang a hem um, ka hun a tungnai puai,” atia(v. 4).

Jesu Ama-leh-Ama kipuung

in Khross a mihingte hukdamna dinga Pathian thilguat subuting in i Hukdampa dinga khawvel ah hung ahi ti a gen hi. Ziakachun, Mari kha “nu” tilo in “numei” a ti ahi.

#### **4). Eloi, Eloi, Lama Sabachthani (Mark 15:34).**

Zia hi Aramaic pau ahia, tuhaksa mama ahi. Azia chu, “Pathian in Jesu a taisan atam?” ti ahi. Gnostic pawlin Jesu kha baptistma achan lai in, Ama ah Pathian hina a hung um a, ahin khenden ah a umlai khan Pathian hina in a taisan gual in a gen u’i. Ahinla, Pathian in Jesu kha bangtik lai inle a taisan ngai puai.

Jesu Khross ah khan jingkal lam dak kua in khenden in a um a, chuleh dakkal thum nung in, sunchang laitakin, leichung pumpi ahungthim a, nitak lam thum lamchan tina ahi. Dakkal guk nung in, Jesu’n Pathian a ko a, “Eloi, Eloi, lama Sabachthani?” Jesu chu A gim mama a, ajiak chu thalek gam nisa nuai ah A thisan leh tui luang in Khross chungin dakkal guk sung a kikhai ahi. Jesu chu ha gim in a gim ahi. Hiloleh bangdinga kiko ding ahem? Leichung ahsetan naseona suse ding leh ei uh a ding ah hukdamna kawt ei

hawn piak dinga hung ahijawi.

Pathian in A chapan khawvel gitlona a puak ziakin en ngamlo ah a um ban a, Lalpa Jesu’n lungkhamna nasatak jia hun ahin a tuak ahi. Tichun, thawmhau leh beidawng takin, “Ka Pathian, Ka Pathian, bang dinga ei nusia la hem?” ti’n a ko ahi.

#### **5). Ka Dang a Chak hi.**

Samaria gam a tuikul bul a dawnding tui adawt gual in dawn ding tui a dawn ahi. Thuthunglui hun ah, Jesu Khross ah A thawk ding tawh kisai genlawkna tamtak a um hi. Sam zik 69:21 ah, tihin a gen hi, “Ka an dingin gu ei piau a, ka dangchak ah dawn ding uain thuk ei piau hi.”

Sam ziktu’n a genlawk gualin, : Jesu’n ka chang a chak,” atia. Thiampon khat chu uain tui ah chun a dia ua, husop mawl in a tak ua, a muk tawh a sutua tau hi. Bethlehem khua ah Jesu Khrist a pian masang hun sawtpi in, Sam ziktu’n Jesu khross ah khenden ding leh a thiding dan ala mulawkte a ziklut hi. Jesu’n, “Ka dang a chak hi” atia, tichun Pathian lekhabu a guitung theina ding in.

Khross chun ah Jesu thugen

pa-ngana, “Ka dang a chak” Thagau lam umzia tawh kisai in vak ngaitua hitiu. Mi tam takte’n gilkialna a thuakzo ua himalehle, dangchakna a thuakzo puau. Jesu kha a gim ma ma ta, ajiak chu Khross ah dakkal guk sung khenden ahitai. Chuleh thalek gam ah nisa mama nuai ah A thisan a luangsak ahi. Jesu’n, “Ka dang achak,” a ti hin taksalam dangchakna sangin Thagaulam dangchakna ana sazaw ahi. Jesu’n Thagau mangthaite hundam A utdan taklatna ding in A dangchak dan ei hil ahi. Ziakiachun, Jesu thisan a hung luanna chung in la kipak din ahia, chuleh midangte hukdamna lampi ah pui-tu hina in Jesu A dangchakna a suno thei ahi.

### **6). A kichai Tai:**

Johan 19:30 ah, Jesu’n dawn ding a dawn a tichun, “A kichai tai” atia, tichun, a lu a kunsuk a, A thagau a tha tai. Zia thu hi thagau lam ah bang etsakna ahi diam? Jesu chu taksa’n a hung kumsuk a, leichung ah a hung a, chanchinpha a hung gen a, hatlo/basamte leh natna neite a hung sudam hi. Chuleh, thidinga laitan ah umte a ding in Khross pu’n hukdamna lampi a siam hi.

Lalpa Jesu Ama-leh-Ama

kipedawk in Khross ah khawvel gitlona chu pua in A subuting tai. Chuleh, Setan nasepna zosia a suse kei tai. Zia chu, Ama’n mingte hukdamna dinga Pathian thiltup a sukbutingna ahi. Ziakiachun, Jesu’n Khross chung ah migilote a dingh in hukdamna nasep zo in, “A kichaitai” ati ahi.

### **7). He Pa, La Khut in Ka Thagau Ka Hun Vawpsak hi.**

Khross chung ah Jesu thugen nunungpen chu, “Hepa, la khut in ka thagau ka hun vawpsak hi,” ati ahi (Luk 23:46). Bang ding a Jesu a hinna Pathian khut ah vawpsak ahi diam? A ziakchu Pathian chu siamtu, lei leh van ah leh bangkim chung ah vaihawmtu, hinna, thina, vangsiatna leh malzawlina zosia enkawltu ahi ziak ahi. Zia hin a gen nawp chu, bangkim Pathian a leh a vaihawmna nuai ah um ahi. Zia ban ah midangte’n aw ngaitaka a kiko a hiat ding uh le a dawidan ahi ti a hiatsak nuam ahi. Jesu Khrista’n Pathian dawidan gual in thil bangkim a subukim tai ti a suklatna le ahikit hi. Zia hi Jesu’n Pathian thu awina bukim tawh a nasep ding a zaw nung ah Pathian kiang ah A thagau a vawpsak thei tai tina ahi.

Upa (Dikon) Stephen le Pathian dawi gualgual in a hinga, chuleh ginna le a vawp zing ahi. Ziakachun, Lalpa Jesu ka thagau la tan,” ti’n a thiding kuan in pauchap hi (Nasepte 7:59). Ei uh le Pa Pathian dawigual ah l hin ua thitiang a ginum taka a na isep phat ua le l thini tak uale hangsan tak in, A kichai tai” chuleh, “Pa La khut in ka thagau ka hun vawpsak hi,” ti thei bep ding ihu.

### **Jesu Thi nung in Bang a ti emle?**

Khross chung ah Jesu chu aw ngaitaka kiko in, A thugen nunung pen a genjaw in a thi tai. Tichun Biakin ah puanzak chu a chunglam apat in a nuailam tiang in phelni a kisua hi. Zia hin thagau lam ah etsakna pawimaw tak mai anei hi. Biakin ah puanzak sau tak mai chu Mun thiango leh Mun thiangothen kikhenna etsakna ahi. Thiampu tilo Mun thiango ah kuama luttheilo ahi. Chuleh Mun thiango pen ah kumkhat ah thiampu lalpen chu khatvei mai mai a lut thei bep ahi. Biakin puanzak a hung kezak chun Jesu chu Ama-leh- Ama chamna kithawina, gitlona bang suchim dinga kithawi ahi tile a kaw k ahi.

Jesu thina vang ah gitlona bang a chiptak ziakin Pathian tawh kizawpna changtak chu la nei theita ahi. Zia chu, Jesu Khrista ah taksanna nei zosia mun thiangothen pen in lut thei tan tin uh, chuleh, thiampu lalte ahilo leh zawlneite chu palai ah nei ngaitalo in Pthian biakna l neitheitau tina ahi.

Ziaziaka chun, Hebrai lekhathawt ziktu chun tihin ati ahi. “Ziaziakachun, suapite haw, Jesu thisan jal ah Munthiangtho pen ah lut ngamna l nei tau in, lampi thak leh hing ei guat piak chu haw in, (zia chu puanjak ah taksa tina ahi.)” (Hebrute 10:19-20).

Ziabannah chun, leichung a kithing a, suangte a puakkek ahi.

Ziagual thilhi tung ngailo ahijiak in khawvel ah thil um zosia a chaw k ling ahi. Than kawt khakte a kihawng a chuleh mithiangthp ala thi masa tamtakte chu hing in a hung tho kit tau ahi. Zia hin Jesu Khrista ginga pawmte chu a gitlonau ngaidam leh thi maleu hing kit ding ahidan uh etsakna ahi.

*Lalpa'n a thu malzawlta hen!*

## **PAUCHAPNA**

~Rev. Thanglianmang  
*Executive Secretary, Manipur Synod*

### **1. Pauchap umzia:**

Pauchap ti umzia chu Pathian kianga panpina dawtna, kipa-kna thu gennate leh thagau ah Pathian tawh kipawl na ahi. Gingtute bep hilo in khawvel ah Pathian helote na tiang le vangsiatna tawpk-hawk a tuak phat ua leh Pathian a ko sek tho ui. Thuthunglui hunlai a chun pauchapna chu zia a nuai ah gual hin gen ahi.

**(i) Pathian min lam/kou:** Miten Pathian min alam pan tau(Gen.4:26). Hukdawk dingin a ko ui(Vaih.3:9).

**(ii) Hawl/Dawn:** Ei hawl un, tichun hing inla'u (Amos 6:4). A dawn un, tichun Vaveng a pi ai (Sam 105:40).

**(iii) Sungdawk:** La thilung gilteu ama'n sungdawk un (Sam 62:8).

### **2. Pathian hona mun leh pauchap lai ah umdan:**

Thuthunglui hunlai ah vaihawmtte hun leh Leng ah a kipuak ua pat in pauchapna min bik anei un, zia te haw chu- Silo(1Sam.1:9), Mizpa(1Sam.7:5-6) leh Gibeon (1Lengte 3:4) te haw ahi. Jerusalem chu pauchapna mun sanga kithawina mun ah amat sek uh ahi. Nikhat ah thumvei Pathian kianga pauchap chu a bawl dan ngai uh ahi ziakin Daniel leh Jesu nungzuite khale a pauchap sek ui (Danial 6:10, Nas.3:1). Chuleh, thuthunglui lai a chun mi nautang pauchapna mu ding a um pua'n, Israel puitute haw chu mipite a di'n a pauchap sek ui. Sam bu leh Job lekhabu te hi pauchapna ngen deu ahi. Thuthungthak hun ah chun Jesu'n Samari numei kianga mun tin ah Pathian hotheina hungtung ina ati gual in mimal tin in muntin ah pauchapna nei thei ahi tai. Jesu leh a nungzuite haw chu tangvum ah zan khawvak ah te(Luka 6:12; 9:28) leh Gesmane huan ah zan ah a pauchap ui(Luka 22:41). Jesu thi nungin nungzuite haw chu pindan chungnungin a pauchap ui(Nas.1:13-14).

Pathian kianga pauchapna hun chu a tangpi'n nitak lam ahi-deu sek hi. Pathian in Adam leh Evi le nitak lam in a pawl in, Abraham



inle nitak lam in Pathian kianga kithawina a siam in, Elijah in Ba-al te tawh a kidem ua Maicham a siam kha nitak lam ahi. Pauchap hun ah a umdan tangpi teu chu- Din pum(Gen.18:22, Marka 11:25), Khi-angkho(Sam 95:6), Kichutpum (2Sam.7:18) leh Chunglam ah banzak pum in(Sam 28:2, 1Tim.2:8).

### 3. Pauchap dingdan:

- (i) Gitlo simkawm ah pauchap ding ahi. Jesu'n leh sedawlpaw pauchap kha a kipakpi ahi(Luka 18:13-14).
- (ii) Ei a ding bep hilo ah midang a ding le dawt ding ahi. Jesu'n le a nungzuite a dingin a pauchap in, Paul inle midangte amin teu lam in a pauchap sek hi.
- (iii) Jesu'n ama khendentute a ding ah a pauchap gual khan ei hawn le ei mudate a ding ah pauchap ding ahi.
- (iv) Malsawmna chuam chuam dawnna ziak ah te Pathian kianga kipakthu gen ding ahi.
- (v) Pathian kianga bangkim chu dawt ding ahi. Ahinla, ei piak lo leh le ama chung a kipak zing ding ahi. Eima lawkna ding bep ah i dawt ziaka lawting lo le hithei ahi.

### 4. Bible sunga pauchap lawting khenkhatte:

- (i) Hannah in chapa a dawn in, tichun Pathian in Samuel apia ahi.
- (ii) Elijah in gawzuk lona ding leh maicham mei ah hal di'n a apauchap in, a lawting hi.
- (iii) Solomon in pilna leh chitna a dawn in, a lawting hi.
- (iv) Jephtha in a melmate zawna di'n a dawn in, a lawting hi.
- (v) Joshua in nisa tuktan na di'n a dawn in, a lawting hi.
- (vi) Esther in a mite hukdawnna di'n a dawn in, a lawting hi.
- (vii) Zakaria in chapa a dawn in, baptistu Johan Pathian in a piat.

### 5. Pauchap phatchuamnate:

- (i) Haksat nikhua pauchapna chun kipakna leh thamuan a tun hi.
- (ii) Pauchapna nei tam chu a hinkhua a jangkhai in, thagau ah chat deu deu hi.
- (iii) Inkuan pauchapna neina chun ki hepina a supung hi.
- (iv) Pauchap hi setan gal zawna galvan hawi pen ahi.
- (v) Pauchap hi thagau ah kisukthianthona pakhat ahi.

## KUATE'N LALPA NASEM DI ?

(1Kor 4: 113)

~ Pu. K.L.Muana

Khrista Lal gam nasem leh Pathian thuguk kemtu dingte hi kuate ahiu em i tia i genphat tak leh, gingu tamtak l eh mipi vantang ngaidan leh kawidan a chun, Missionaryte, Upa Ordained, Bible Teacher, Pastor leh Evangeliste sepdingdan in ingai mai sek ui. Ahinlah, zia ngaidan leh pawm dan hi dik bukimlo deu in alang hi. Ka mudan leh i Bible in ei ziltil dan i sûtngun deu chun, Khrista ah Piangthak, ginn ahing, Pathian Thagau Thiangtho tawh kitimatna nei, muthei leh mutheil o gam ah Pathian mizia diktak nei leh kalchawipi, sunggil ah meigui gual ah ki zawpna nei, insung, khawlai leh Pathian hing nei nailote kiang ah Pathian mel phatna leh a mizia sulangtute hi Lal pa nesemtu leh thuguk kemtute chu ahiu. Ahileh, kuate kiangahLal pa na chu a sepdiu ahi ta diam?

Zia chungchang ahin l Bible ei ziltil dan neukhat vaken kit hitiu. Jesu khawvel ah a lenlai akhan, a nungzuite, adiakin Peter kianga khan, “Ziate sang ahin lei hepi zaw em?” ( John 21: 15-17) ti'n tamvei tak adawngta, a dawnhuna chu, “l , Lalpa nang la he nai.” Ahileh, ka Belamte chingin/vâk in/chawm in” ati gual in Lalna i sep didan uh chu hiathei ahi tai.

Chuti ahileh, Khrista phu dawk Kochuam thiangthoten isepdiu chu Gingtute chawp leh vak ding tina ahi. Zia gualma bawk a chun, Khrista Chanchin-

pha henailote Lalpa huang ah puilut di ahi. Hepina/ Hukdamna lampi kawkmu hi i mawpuakna'u ahi. Zia hepina hi nasep a panlo chun a thawn mai chang di ahiziak in i hindan leh i khanchan hi Khrista tawh akilawm phawt di ahi (John10:7-13). Pathian thugen thiamna bep ahem, Policy leh programme siam thiam ziak bep hilo Belampu pha, a Belamte'n le a aw ahiaat thei ahi ngei di ahi. Pathian hing thiangtho leh a chenchilpi i hilo chun, Belamte chawmzolo ding leh Khrista thuguk kemtu diktak leh Belampahatingzolo di i hui.

## **VAIHAWMTUTE HI PATHIAN NASEM AHU. (Rom13: 46).**

I khualzinna'u khawvel leh i kochuam vaihawmtute hiting in, tinglo bang ziang sek maleu musit leh dangdâk mailo in, mihi-am leh Pathian guat ahi gualma un, a vaihawmna dan uh chu zui masak phawt di ahi. Leng Kura chu Pathian in a Belamte veng dingah a guat ahiziak in gun chu tak in Pathian Belam chu a veng ngut ngut ahi (Isai 44: 28). Zia gual machun, Babulon Lengpa Nebukadnezar hi ka nasem tu ding in ka guat ahi (Jer.27: 6). Gam vai hawmtute dawkan (Table) chu Pathian nasepna dawkan leh Lalchutpha chu ahi. Zia thupiak chu i zui ahi chun, taksa leh thagau ah malsawmna i changei uh ka kinem hi .

Zia a chungah i Bible thi angho in ei zilfilna hi zui in, mipiten i Gam leh i Sakhua vai hawmte dawkan hi Khri sta nasepna, Vaihawmna chut pha ahi ti ah pawm in, a hatlonateu hil in, sawmdawl leuhin, mal awmna dawng ngei ding ihu.

## **SUAKTE HI LALPA NASEM AHU.( Kol 3: 23)**

Suak ti kampau/ kammal hi a hung gitdaw leh thu ngain-

awp umlo tak abatna a um ah, amatdan leh a kawkdan kichian i hiatthiamlo chun ngai thiam a haksa thimsek hi. Ahinla, Sawlchak Paul in, "La hi zosia mi a ding ah sem hilo in, I Lalpa leh mipite ading in hat tak leh kukal takin sem in" atizaw ahi. Zia bep chule hilo in, suakte chun apute'u na chu ginum leh kukal tak in sem uh hen ati ahi.

Mi zosia hi Pathian suak ihu ua, ahawn(group)ah um i hiziak un, Vaihawmtute hile ati pen hidiak khel sam puanau. Himaleh, 'Simbung' laka le atangzâng deu ti gual ah Vaihawmtu ding ah kiguat ahi ziakun, a thupiak uh leh vaihawmna i zui thei uh chun, khawtang leh Kochuam kivaipuakna ahin masawmna leh lawtinna phazaw sem i lak un hung um ngei in tin; Khawvel thim tak salvaktu, Khrista chanchinpha henailote ading ah pak gimtui leh ngaichat kham hung ting tantin; Taksa leh Thagau lam mitvakna leh Lalpa kumtuang vaihawmna, hukdamna dawngkawt hawn piaktu hung hingei ding ahi .

--o0o--

## KHRISTA AH HINDANPHA

By: Tv. Pausawndam

Banghitaleh, la umdan uh chu Khrista chanchinpha tawh kituak sak phot tau in; PHILIPPI 1:27. Amasa'n hunhawi hunpha eipia a, i mau ei puitu Pa Pathian chu lopi-na chang ta hen. Khrista chanchin a kalsuanto zel theina lai ding leh khat leh khat kisu hat tua theina lai ding a damna ichang nalai ua, I vang phatna tak uh chu ahi. Tuni hun ahin Chanchinpha a hindan ti thupi mang in chawmcha vak holim hitiu. Suapi dawitak Piangthak Pathian a kimu daw thakna kanei tai lati a, lahindan in Khrista chanchinpha azui diaklo chun, nang a pat gadawk ding leh la vak a mite'n chanchinpha milo a, midangte nek thei ding bangma piang lo hial ding ahi. "Va ga ding leh tamtak te nek ding a khawsak chu gingtute imaw puaknau pawimaw tak zet chu ahi." Ahinla, Bang ziak a, midang in I hindan a gapha nek ding mu ngailo ahiu em! Bang atia Khrista a ivaknau midangte'n mu ngailo ahi diam uh! I kam in Pathian thugen sek leu hin le, I lunggil teu leh ihindan un izui

lo phat leh chanchinpha chu tawh iki gamla khasek ua, Pathian a pat malsawmna leh malzawlina idawng thei ngai seklo uh ahi. Hi e Lalpa'n mitin chung a thilpiak a nei chiat a, nang chu asem ding ah ahung piak le lahi mai thei, ahilo le agen ding ah ahung piak le lahi mai thei, himaleh Lalpa'n nang ah athil kaw chu bang ahi em! Asem ding lahi em, agen tu ding la hi em, ti chu nang leh kei in iki hawl dawu chu angai ahi. Pathian min in thilbawl theitak himaleu hinle Khrista chanchinpha a hindan danglamna inei diaklo ahi chun, Pathian apat kilakna ititeu leh Pathian apat siam thakna iti teu hin Lalpa naina lam ei chansak puan tin, lunggil phatlona, kihisakna te, Chaponate ah ihinkhua ei tuttu hi zaw ding ahi. Ziaziak a chun, Midang te ading a malsawmna, midangte ading a vakna leh midangte ading a Khrista a kingakna I chantheina ding ua chun **CHANCHINPHA AH HINDAN PHA** chu ivawp ua izui ua, I hinpi zing ding uh chu angai ahi. "La hindan uh chu

Khrista chanchinpha tawh kituak-sak phawt tau in.” Tulai Khawvel bangziak a gitlona sang deu-deu a, phatlona lul deudeu at-am??Mihiam ihi ziak in adinmun ihaksat ilunggel aki bang pua, khen khat lungchawm, lungna vak, khen khat lunggel piting mama ziang aki um kit ahi. “Lungnau in la gilo kiu in, lalungnatnau Nisa’n tumpi kihen.” Ziaziak a chun, lungchawm in gilo male hinle ilungnatnateu nisa tumpilo a Khrista hindan tawh kituak a chanchinpha zal akhan suk mit zel apawi maw ahi. Suapi daw-itak, Khawvel gitlona asang tak ziak chu Thilpha hengal a bawl nuamlo, dikna hengal a dikna a lampi kizui talo. Kochuam sung ziang ale minei leh neilo ikhen dan tau a, suapi u leh nau hita hen, puitu ding inle kidawisakna atam ziak ahi. Ziagual chu ahi bangtin ginglo mite’n ei apat chanchinpha chu muding ahiu em, !Chun, ”Nangma mit a kidak um khel dawk lo a, ginna a lasuapite mit a kidak um lakhel dawpiak guat ziak in phatna sang in gitlona chu asang zaw ding him chu ahi.” Kua kademna ahi puai, Pathian nasem a kingai, Pathian nasem a kikawi, paw-

lawng a Pathian nasem, sunggil a sum leh pai thunei nawp hawl gingtu hingal itam tau a, ihindan ua Khrista chanchinpha hinpilo gingtu Pathian nasem itam tak luat ziak ua hin, Lalpa gam aki-kek lian thei pua, ikiang tuam a um ginglo mite’n chanchinpha ei apat amu ngai puau a, igam sung ziang in le phatna sang in gitlona leh kidaidanna asang tultul zaw ta ahi. Ziaziak a chun, Khrista a siam thakna hinkhua a chun amasa pen in eima mimal hinkhua a Khrista chanchinpha a siamdanglamna a um a, ihindan uh chu Khrista chanchinpha tawh dung zui a ikalsuan ding uh chu ahi. Chuti leh midang ading in vakna hintin, midang bep hilo a ginglo mi a ikawi te’n le ei apat vakna chanchinpha chu muding ahiu ahi. Kikhawmte kademna ahi puai, Kikhawp apha puai katina ahi diak puai, Kikhawm khawm ziang Pa ahem nu ahem hindan a Khrista chanchinpha nek ding um lo sang in, Kikhawm khalo pa ahem nu ahem hindan a Chanchinpha nek ding a um zawk chun zia chu alul zaw hilo ding ahem kati nuam ahi. Kikhawpna chu ginna lampi a kal isuannau a ikisuk hat thakzel nau chu ahi.

Chanchinpha a hindan pha ihi theina ding ua chun, Liangvaite leh mihaksate, minuai ate ikawidan leh ibawl dan un akilang dawk theipen ahi. Nang in Miki-dak umte leh miliangvaite bangtin labawl em!!!Lakam in bangzat gen le chun leh la hindan mi lami zia hung sulang ding ahi. Khrista a siamthakna chang in vel bangzat ahem piangthakna chang male chun le Khrista sepbak nasepna leh Khrista chanchinpha a lahinkhua lamat diak lo chun, athawnmai hiding lahi. Ziaziak a chun, Bangkim ibawl tapoteu leh ihi tapoteu Pathian a gual a sem a, achanchinpha tawh ikhaw sak zing ding uh chu gingu te Khrista akokhawm kochuamte

imaw puaknau lian tak chu ahi. Ziaziak a chun, Tuni hin Khrista chanchinpha in lakhawsa zing na'm? ti ki enchian thak zel sek in. Khrista sepbak sem ding a Lalpa'n ei guat te ihi ngal ua. Amen. A thu tawmtak a izik teu Khrista hindan tawh kituak a kalsuan a khawsa zing te hithei zaw ta ding in lalpa'n ichanchiat uh ading in ei malsawm piak taken. Kakipak."Mihiam ihi zia in gen tinglo leh kituaklo um kha thei ahizak in, igenkhial te kidem tua zianglo in Chanchinpha a idetzawk diakna ding un kihil tua zel zawitiu."

--o0o--

## HUKDAM NGAI MIHING

**Rom 8:1-2; Heb 2:5-7; Rom 3:10-11, 14-17, 22-23; Sam 51:1-12.**

**By: Rev. Seilunlal Vaiphei.**

Hukdamna thu him him hin a huap lian hi. Bible pumpi hile hukdamna thu lam ngen ahi. A paukam umzia leh atup ziang hile suikham tak ahi. Sakhaw dangten le hukdamna lam ngen a zil deu sek ui. Khristian Thugin in a gen dan lampi hiat a ngai hi. Hukdamna chu bang ahi em? Bang ziak ahem hukdamna chu a hung um? Bang gual ah hung um ahem tite hi chawmkim chan gen ding ihu.

‘Hukdam ngai mihing’ ti chungchang gen khawm ding i hui. Bang laka kipat in ahi em mihing hi hukdam i ngai uh? Zia hukdamna mak tak chu bang guala nei ding a hi em ti te hi i hiatchian uh apawimaw hi. Zialo a chun hukdamna hi i thagau bep uh hilo in, i lunggil, i taksan ahuap ahi ti hi hiatthiam akul hi.

Hukdamna thu hi Khristiante thugin kingakna lailungpen ahi. Hukdamna thu hi ihiatchian masat phawtlo ua a hi chun, Pathian thu dangle mang thiamlo in, I Khristian hinkhua le dik thei pua’n a. Pathian nasep lulpen chu hukdamna nasep hi ahia, zia chu Khrista ah ahung kilang hi.

**Hukdamna chu bang ahi em?:-** “Hukdamna” ti paukam hile suikham tak ahi. Bible ah imu teu

hi Hebrai pau ‘Yasha’ leh Greek pau ‘Soteria’ apat ah hung piang ahi. Hukdamna thu Bible ah i mudan tangpiu chu ziagual hi ahi. Thuthung Lui achun taksalam thu hukdamna alang tam pen a, thagau lam leh thi nung hin dan thu lang maleh a tampuai. Melma laka hukdamnate, siatna leh vangsiatna laka hukdamnate, gam leh nam bitna lamte a kawktangpi ahi. Thuthung Thak in ahileh chu damsung bep hilo, thi nung tiang ah hinna lampi ziltina i muu hi. A bulpipen ding in Pathian kipuanna phaktawp/sangpen Jesu Khrista ah akinga sik sek hi.

**Hukdamna chu Kuate a ding ahem?:-** Nam tin leh chitin leh kawlkil a mizosia muthei ding in leh chanthei din Pathian in hukdamna a siam hi (Isai 52:10).

Khawvel zosia chia ah, thilsiam zosiate leh namtin kianga hukdamna chanchinpha hil dinga thupiak i hiu(Mat 28:19; Mk 16:15, Nasepte 1:8).

Hukdamna chu eimau hun ah mamaw tapote a ding in ahi. Thu Thunglui hun ah a namtel Israel ten a mamaw dungzui zel un a changsek uh ahi. Taksa leh a khawsak nau kawng zosiau ah, sungkuan khawtang, gam leh nam, sawlkar ading tiang in le Pathian hukdamna a lul mama ahi. Thu Thungthak hun a hin hukdamna chu mitin a ding a hi thu i he tau, hukdamna umzia chule a bukim ta. Taksa leh thagau, hindan kawng zosia huap, tuma, tuhun leh tununga, umta, umlaitak leh hung um ding in ahi. Mihing leh thilsiam zosia a ding in lul leh kulpen chu hukdamna ahi. Zia ziak tak achun Pathian in a siam ahi him ahi.

**Hukdamna chu mi zosia ading himaleh gingtute bep chanding:-** Bible a chun hukdamna chu mi zosia a dinga siam leh guanggal ahi(Lk 2:10). Himaleh, mi zosia'n nei/chang khello ding ahiu. Johan 3:16-18 ah chun, "kuale" ti hin hukdamna chang ding in khenchuam a umlo zia a gen a,

zia chu zui chiat in 'a ging taphawt' ti in Jesu Khrista gingtute bep in zia hukdamna chu chang ding ahiu ti a genchian ngal hi. Hukdamna chu a petu Pathian in phal takin a daw i tapo in neithe i ding in a siam a; himaleh, a nei nuamte chun Jesu Khrista ginna leh a thu a thu-awina in a daw inau chu a latsak diu ahi.

Mi khenkhat in "ginna ziaka hepina hukdam" ahi ti hia'n Jesu chu Pathian ahi ti a gingcha ngei ua, maleh, a Lal dingua pawma, a thupiak zawma, thilpha hi a gaw diak puau. Lungthim ah gingchak mai a huntawk pua, ginna chu nasep tawh a semkhawm ding ahi zawi. Zia gual a chun, mi'n Jesu Khrista a ginchak leh chaklo chu a hindan in a hilsek a, a ginnau chu a nasep un a lang sek hi. Sual sim gaw diaklo Jesu Pathian ahi ginchak hi Bible gen 'ginna' a ting zo puai, thilpha hi mai ah hukdam hi guatle a phachuam diak puai.

Hukdamna chang ding a chun Jesu gin a, hinna ah Lalpen ding ah pawm a, a thupiak zawp a thilpha hi ding ahi. Thilpha hi chu 'Hukdamna' ahi pua, hukdamna changte'n thilpha a hi



zaw sek ui.

**Mihing Hukdam ngai ihu:-** Mihing zosia hi gitlo ah i kilik tâk ziakun, hukdamna i mamaw uh ahi. I phatnau leh i felnau zia kin hukdamna i changthei paw ngâl un. I thilpha bawlteu hile Pathian mitmu in a tingzo him him a um pua, “kua ma thilpha bawl him him a umpuai”(Rom 3:10-11). A hitizing lai hin “kei chu ka nai” tithei him him i umpuai, tita mawng leu hinle pha i ki sakna lâi tak uh hi Pathian kidak lamtak ahi ngal ah.

Hikhialna zia kin hukdamna chu changzo talo hileu hinle, Pathian mitmu in, mihing chu sangtum gual mai ihi diak puau a, amau ah chun Pathian in a sukhin thei a um nalai a, a hepina aw dawnhu thei a um nalai hi. Ziazia k achun, mihing chun a hukdam thei dingtu chu a mamaw ngawi ngawi tau a, kumtuang ginna chang ah gitlo apat puidaw k theitu a mamaw uh ahi.

**Eima leh eima kihukdam theilo:-** Thiamlona leh siatna sual gawtna ah mihing ki tân na hi det takmai ahi. Eima leh eima taidaw k ah ki hukdam thei ding chi ahi puai. Bible in a gendan khenkhat vak taklang hitiu:

Sual/gitlona suak a tâng(Rom 6:16-17), gitlonan a nawp dan dan ah a thunun leh a mat, a sawisak ahi. Hindan a pumpi a thunun vek a. Thiamlo chang(Joh 3:18) Dikna Pathian vaihawmna lak ah thiamlo chang, gawt leh gawt zêl ding mabak ah nei mihing ahita. Thiam thu gen ding a nei puai. Gitlo man chu thina ahi(Rom 6:23) Sual/gitlo na zia k ah thina thuak zing, Kumtuang thina mabak an nei ahi baw k ahi. Bat dit theilo zia k a gawtna thuak ding ahi(Mat 18:34) Pathian lak ah bat hi dit sen gual ahi puai.

Eima leh eima ki hukdam theilo, mihingte damna semdawk ding in Kros ah a thuak a, ama leh ama a ki sudam thei ngal puai, atiu (Mak 15:31). Ei uhin ama a kisukdam lo zia k in i ngansia zaw tau ahi.

**Hukdam theitu Jesu bep:-** Pukna zia kin in mi hing in Pathian batna i man sua zotau ah. Pathian kibatpi kitna ding ate, Pathian tawh kizawp thak kit theina ding ate'n vansawlchakte laka kua ma ating zo a um puai. Pathian a batsak kit theitu chu Pathian bawl ahi. Ziazia kchun, Lal Jesu chu taksa ahung chang a, Kross

thina huaisiatak ahun thuck a. I thasang uau a thawkna ziakin hukdamna lampi ahun hawng kita ahi.

**Pathian nasem dinga hukdam ihu:-** Pathian in a cha pa changkhat neisun hina ngei mangcha hukdamna lampi ahun siam hin thiltup bang hem chu nei ngei ding ahi. Hukdamna ah Pathian thiltuppen chu mizosia leh a thilsiam zosia'n Ama Pathian na asepa theina ding ua lampi asiam ahi.

Mihingte hi panpi ngaite panpi ding ah hukdam ihu. Chun, nisin i khawsaknau zosia ah ginum ding leh tai ma ding leh a thu-awi ah a dawilote haisan ah ama dawi gual ah hinkhua mang ding ah hukdam chang ihu.

--o0o--

# **Khristian te adi'n ROCK MUSIC Hawilo**

**By: P.T Khawm**

**Thumapui:** Tulai i khawsak nau, khawpi/khawcha khua hita le khanglai tamtak in mobile/ player a la angai mun mau mau Rock music/ Rap songs chung chang hi lekhabu chuam chuam pansan(base) ka hung zik ahin,bangziaka zia thu hi ka hung zik khel khel ahem iti leh, i cha inau te hi kua a le bang hi chuamlo in laa angai teu hawhi la manthei umtalo asak thawle hitalo agen agen thaw ziang hi atam tak ziak in i khristian na taw akituak taklo ziak in leh i hiatlo kal ah khanglai tamtak te puimang theiding dinmun ahi tak ziak in,Nu ieh paten ngun tak in ngaitua khawm hitiu.

MUSIC iti hi bang ahem? Music kiti hin agi thei zosia ahuam ahi, music iti pen hi 1035 A.D in "Ar-razo" khawmi "Guido" kiti hin ahung siam daw ahia, aman asiam zaw in music chithum in ala bawl hi zia te chu (1) Graphical system,( zia hi lal David tingtang apat hung kibawl dawk ahi) (2) Symbolic system: (zia hi staff notation ahi)(3) Alphabetical modulator: zia hi miss Gloven in ahung lem dawk ah,zia zaw achun Rev. John Curwen in 1849 kum in piting taka matthei ding in ahung siam(modified) dawk ta ahi.

**Rock music hung kipat dan leh achan chin chawmkim:**

Zia rock music (setan rock music) hung mudawk tu ahi leh Jeff Godwin chanchin kizikna a

"The devils disciples" (1985) leh "Maratha prophetic Alert,Vol.58 na a DONE standton in zia lekhabu review' a labawl na ah kimu ahi. Jeff Godwin hi challang deu a apan na ahi leh 'Rock Group' laka ala ki bual ahin, ama gendan in Tulai Rock music apat 'Star' ti ah hung minthang dawk te haw hi 'Setan' apat malzawlina chang ahui ti ala gen ahi. Zia ahung kipatna chu 'setan' ma ahi ati ahi. Rock music hi 'Africa' gam lailung acheng nam mawl te 'THITHA' hona/Biakna(Voodoo) ah akhuang bet git uapat hung kila dawk ahi. Sapkang(English) ten mivawm(negro) mite suak leh sal ah ahing matlai un zia mivawm te chun a pathian uh a ho phat uleh khuang abeng sek ua,-

zia a khuang bet git ua apat zia Rock Music hi hung kipan daw kahi tin asui daw k u h ahi. Ziakiak achun 'ROCK Music hin thuguk anei suak kei hi aki ti ahi.

Rock music in ahinkhua asuksiat nunga hung kile kit chanchin khat vak en hitiu....

A khanglai hun sung cheng Rock Music Group in ala kimang zing a khanglai hinkhua zosia ala mangtum kei Jeff Godwin kiti pa hin Jesu Khrista Lal leh hukdampa ahung pawm phat in ahin khawlui ah a gam tat nate zosia te kha angai tua leh kisik in akap hut hut mai ahi. Aman agen zel na chun,Tulai Rock Star minthang ma ma tehi Setan malzawlina chang in zia hi ala siamdawu ahi ati ahi.Tulai khanglai/Tanglak te haw hi zia Rock music hin a ngawlsak zo ma ma ahi. A dik taka gen in Rock music mudawktu leh hung uang bawltu bulpi pen chu kua dang hilo in melma pa setan mama ala hidan Jeff Godwin in ala suidaw k ahi.

'Rock Band' minthang ma ma alau um khenkhat vak thil hitiu:

**Setan music:** Zia setan music hi mihing thagau(soul) hi sukbuai ding ti chu atup thupi pen

khat chu ahi,chuleh mihing taksa nawpsakna leh etlana leh mit utna ala suhat mama thei hi,pathian thu le gentheilo in ala dodal nalai u h ahi. Zia ziak achun tulai khangthak te kiven leh pilvan mama apoimaw ahi.setan a ding in vanmat hawi mama khat a tepte kham chu Rock Music hi ahi. Band' minthangte chanchin hunkhop ahawilo dan u h vak taklang hitiu.

### 1. AC-DC:

Zia Band min lamsau ahi leh (After Christ, Devil Comes) ti ahi zia Band ah Lasa thiam minthang mama mi 5 a um ua,zia te laka Bon scott' kiti pa hi zu in ala thi ta ,a lasak nunungpen ahi leh 'Gawt mun lam zawtna' ti ahia a la thu tamlo cha vak en hitiu. "Gawt mum lampin ka chia zing hi, ahung daltu bangma um lo in ,setan in lampi kabat eidit piak hung en tiam u, gamtiam ka zuan zing hi" zia la sak zing lai achun mitampi gawtmun in akai lut zung zung hi atiu ahi.

### 2. BONJOVI:

Ama hin "Home bound train" album asiam na ah A La khat chu zia gual hi ahi---"Naupang neu kala hilai in,Setan in ka khut a eikai in,ka in ua pat ei puidaw k

in,pawsal piting khat ei suak sak hi” tin ala sa ahi.

### 3. EAGLES:

A mau Band hi 1970s kum a top song ala lak uh “ Hotel California” la pen ahi. Chun amau hinle “ Gawtmun in nuamsa tak in um in”(Have a good day in hell) ti la hile ala sadawk uh ahi.

### 4. Michael Jackson:

Zia pa hin album asiam ‘BAD’ kiti abawm(cover)in “ chibai setan, ka pathian nang mama lahi mithudik” tin ala zil hial ahi.

Amu sia tilo zik ding tampi am nalai ui i gen nawp pen tak chu amau chanchin ahi pua i hiat thiam thei zawk na ding un tia neu khat ka hung tak lat bep ahi, zia ziak ahin nu leh paten le i cha inau teu hin bangthu bang la angai nuam deu uh em television bang channel a en deu u em mobile phone bang picture a en uh em bang la angai sek uh em ti hi hiata etsui a poimaw mama ahi, chuleh khanglai tenle sapla(English) haw hi athu mal hiat chianlo bang la bang gen ahi hiat chian lo te haw kha mawk limpi ziang kin zia zosia khan thuguk nei ahi ti he mil him him, kin, La hiatlo kal ah hung puimang ziang thei ahi,chuleh La hiatlo kal ah

setan choihoi ah lam lam ziang le hikha thei lahi, zia ban achun khutzung ah etsak chuam chuam(finger sign) haw hile ngai sang ta lawkin zia zosia hinle thuguk nei ahi, khristian khanglai khat ading ah kilomlo tam tak um ahi. Chun, taksa chung kizik pawl (Tattoo) Pathian in la taksa chung uh sutvawm ahem zikpawl ahem la bawl lo ding uhi tia ala gensa ahi tai.

**Thukhak na:** Kuale sim tute zosia Thuphalo,la phalo apat i suachak thei na ding un Lalpan i leng un ei malzawl chiat tau hen!

HAPPY ANNIVERSARY  
**DAMNA AW**



**4<sup>th</sup> Anniversary Message**

*1<sup>st</sup> March 2021*

Pathian mapuina zal in DAMNA AW kum 4 channa tiang muzo thei in i umna chung un, amasapen in bangkim ah i ma'u ei puitu  
Pathian chu lopina chang ta henla.

Tuni chan ah Article hung contribute te zosia chung in kipak thu ka hung gen hi. Chuleh, a kiphudaw apat ah 'DAMNA AW' hung phungvuktute (***Patron member, Supporter, Encourager leh Memorial gift, mimal subscriber***) zosia zal ah kum 5 melmu thei in i um a, la tawmngaina'u leh panpinate'u chung un kipakthu ka hun gen kit a, Lalpa'n ale tamtak in hun malzawl taken.

Zia 'DAMNA AW' mangcha'n Lalpa'n ngainatute haw zosia chung in Damna, kipakna leh limna, thagau lam tiang in malzawl taken.

*Zia ban kit ah chun, tusang ah hawizaw leh phazaw support to zawm zel dingin le la tawmngainau leh ngaikhawkna ka hun dawn hi.*

*~Editorial Board*

**Jesu Thawkit Ni (Easter Sunday) Sermon:****Thupi: A Tho kit tai.****Bible: Mk. 16: 1-10. Kor.15:12-20.****by Rev. S.T. Kaia Vaiphei**

**Thumapui:** Jesu khawvel ah a lenlai in a thi masang in a thawkit ding thu hi a nungzuite kiang in thumvei a la genlawk hi. Jesu thawkitna thu hi Khristiante sakhua thugin kingakna pawimaw takahi. Khristian masate chun Jesu thawkitna hi khristiante ni nit/chan dang dangte sang in le a la mang masapen uh ahi. Easter Sunday ti hi Jesu thawkit ni tina hi tho maleh gingu masate chun kisukthian ni, van kang set ah kivanna ni in a la mang uh ahi. Khawvel ah sakhua chuam chuam tamtak um lak in khristiante sakhua bep hi thina a pat thawkitna neite I hiu.

**Jesu Thawkitna:** Jesu thawkitna ni hi a hung tun ding tak leh kochuam tam zawten thanmual a va chei sek ui. Thawkit ni zingkal matak in thaam lam in a chia sek ua, pauchapnate nei in a hung kile kit sek uh ahi. Jesu thawkitna hi gingu kingakna suangphum pawimaw tak ahi. Jesu chu thina zo in thaam a pat a tho kit tai ti khel ah chanchin kipak um dang gingu ding in a um diak puai. Thaam tizat umna zosia Jesu a zaw taak ziak in thina leh thaam hi lau a um ta puai. I neulai chun mithi a um tak leh I lau ma ma sek a, I chang in I um ngam ngai puai. Chun khawthim tak leh khawitak ahem khat ah chi-

ana ding a chun thaam hawm malam ngai ahi chun I chang in I chia ngamngai puai, thaam chu mun dang sang in I lau tei sek hi. Nidanglai ah I pi leh puteu Khristian hi masang vang vang a chun thaam hi a gimnei diak a, thaam a chun bang bang hem a khaikhawm sek uh ahi. Tuhin chu Jesu gingu, "Aw thina khawi hem la gu chu, aw thaam khawi a hem la zawna chu" I ti theinau ziak chu Jesu thina zo ah thaam a pat a thawkitna ziak ahi. Jesu thawkitna kikawppite chun thina chu a zo tau a, thina chung un thu a nei ta lo ahi.

**Jesu Thawkit Ding Venna leh Genlepna:**Jesu a damlai in thina

a pat a thawkit ding a genkhak ziak in Juda sakhua hotute leh Rom sepaiten dan leh a nungzuit-en a luang hi a la gudawk in, a la pawmang in thina a pat a tho kit tai ti khannau ti a lau ziak un thaan chu kituup tak in a bawl ua, a thaan kawt chu suang liantak in a sit uh ahi. A chutilochun a nung-zuiten a luang chu a la pawdawk leu a masa sang ah buaina lian zaw a suakdaw khak ding launa ziak in thaan a chun sepai vengtu a muan um thei ding pen in a ven sak ua, thaan chu nusia keei lo in routine siam in a kithaak thaw uh ahi.

Himaleh chawl ni ti chu Sabbath ni ahung kichai in zingkal matak a chunlin ahung kililing a, thaan veng sepaite chu lau in a taimang tau ahi. Zia chun Jesu kivuina thaan suang chu a hun likdawk ta, Jesu chu a tho kit tai. Sepaite chun thil um dan chu kichiantak in a mu a, zia chu lengpa kiang ina va gen ua, maleh Jesu chu a gen gual ngei in a tho kit taiti Juda mipite hiat ah a kithan ding launa ziak in sepaite chu sum tamtak a peguu a, Jesu chu zan ah ka imut kal un a nungzuiten a luang chu a hung gumang tau ti a gensak ua, ziaziaichun Judate lak achun tuni

tiang in Jesu chu a thokit puai, ti in a kithan sak uh ahi.

**Judate Thaan:** Judate hin a thi masang un thaan a kisiam masak sek ui. Jesu hin vang thaan ding ziang le a nei masak lo hin tin, a thi zaw keei phat in Sabbath ni masang ah a luang vuilo ah a um khak ding chu Juda dan a chun phal ahi lo ziak in Jesu ngaina mi hausu khat Joseph Arimathia khuu cheng chun Jesu luang chu Pilat kiang in a va dawn a, tupat puan nem in a tuam a, ama thaan ding ah a kibawl na mun a chun a vui tai. Judate thaan hi eimau a gual hi lo ding dan ahi. A diak in mi hausate chun a thaan ding uh chu chek ah deng in hawitak in a chei sek uh ahi. Chun mi hausu leh mi lopite chu a ngaina a insung miten a luang chu gimtui a va nu theina ding un a thaan uh chu hawn thei ding ah thaan kawt kisiam sek ahi. Jesu kivuina hi le mi hausu'n ama kivuina ding ah a la kisiam ahi ziak in phatak ah siam ahia, thaankawt chu le mihing leh ganchaten bailam tak ah a hawn ziang thei lona ding un suang liantak ah kisit ahi. Isai chun 'Ama chu mi hausu thaan in vui in a um a' a ti ahi. Nidang lai chun mi hausate thaan



kilu hi a la um sek ahi. A ziak chu mi hausate leh mi lopite chu a thi tak ua leh a insung miten a ngainat uh etsaknan thil mantam, nik leh puan pha a kipuak sak uh tawh kivui khawmte chu guchaten a va chawm sek uh ahi. Jesu luang chu le a hi sek dan uh ngaina gual in Mari Jesu nu, Mari Makdalin leh Mari dangte chu Sab-bath ni kichai a, zingkal matak in mi mu man khak ding lau in thaana lam a chun Jesu luang chu sathau nu ding in kinawtak in a tai uh ahi. Himaleh lampi ah a chia kawm ua chun a buainau; a lungkhamnau liantak khat a um a, zia chu ahi leh amau chu numei ngen ahi ziak un Jesu luang chu sathau a nu theina ding un thaana kawt sitna suang liantak chu kuan ei likdaw piak ta diam, ti hi ahi. Unaute haw; I hinkhuau a hin haksatna lian tak tak eima zaw lo ding thil I tuak to sek a, dam-lona beidawn um tak, sum leh pai ah haksatna lian tak, nek leh chaak, sil leh chen leh cha leh nau etkawlina lam in le haksatna leh buaina lian tak tak I tuak sek hi. Ziate chu eima hatna zaw ding I ti lai in thil hithei ahi pua, I lungkham ma ma sek hi. Peter chun "La lungdawn lungkhamnau

zosia ama chung ah septhau in, aman la khankhua ding uh a gel nai" a ti ahi. Chun Jesun le "Nang uh semgim leh puakgik pua zosiate haw, ka kiang ah hung un; keiman chawldam sak ing ka" tin ei tiam ahi. I puakgik Jesun ei puak piak nuam a, ama chung ah nga ding in ei dawi hi. Chutia malam hinkhua ding gel ah buai tak ah I um lai in Pathian hatna suang ah kal i suan to ahi chun eima hapan le ngai lo in Lalpan ei a ding in likdaw san a la kawit sek ta ahi, Lalpa lopina chang ta hen.

**Jesu Thawkit Chanchin:** Jesu luang sathau nuu ding ah numeite chu lungkham tak ah achi-azing laiun thaana chu a tung tau a, a tun ua ahi leh mak tak mai in thaana kawt suang chu likdaw sa in a la um ta, a ngaituanau ah lut masapen chu a luang hi a gukmang uh hi tan tia maksa tak ah a vak khaw hei ua leh thaana veilam pang a chun Vansawlchak pakhat puanvam set sil hi a la um a, ama chun lungkham ki un, Jesu a vui uh kha hawl la hui ti ka hiai, en matiam un, zia hin a um ta puai, a gen gual ngei in "**Athokit tai**". Galilee lam ah la masang un a la chia ding ahi. Chiau in la,-

zia thu hi a nungzuite kiang in va gen un a tii. Thaan sung chu a lut ua leh a kituamna puan bep longal chu bangma a mu ta puau. Tichun lau kawm kawm leh kipak tak chung in kintak in innlam ah a kilekit tau hi.

**Thawkitna Gingtute Kingakna:**

Paul gen dan a chun Jesu chu a thawkit nung in Peter kiang in a kilak masapen a, a ban in nungzuite leh mi dang dangte kiang in a kilak hi. Paul in a chainan ama kiang ngei ah le kilak in a gen hi. Jesu chu a thokit ngei hi ti phawtchianna ding a thawkit nung in mi dang dang kiang in a kilak hi. Jesu chu thina zo in a thokit ta, thina chun a chung in thu a nei ta pua, thaan thim lau um chu a zo ta,gingtute thawkitna mapuipa a hung hi tai.

Mithi thawkitna hi um lo ahi chun Khrista kha le kaithaw hi puan tin, ka thugen uh a thawn hin tin, ka ginnau le a thawn hin a, tin Paul in a gen hi. Khristiante ding ah thawkitna hi a um ziak in thina chun gingtute chung in thu a nei ta pua, thina chu le lau a um ta pua, ziaziaakchun thina hi gingtute ding in van taksa neina ding ah siam danglamna bep a hung hi ta ahi. Paulin Thessalonika mite

kiang a chun midang kinepna neilote gual ah ipmute umdan chungchang la hiat lo ding uh ka dawí puai, tin a thamuan hi. Jesun thina ei zaw piak taak ziak in I taksau lei ah siam hi lei ma chang kit ding himaleh lopitak ah kaithaw ah um ding I hi ziak un Lalpa chu lopina chang ta hen.

*Lalpan a thu malzawl ta hen,  
Amen.*

--o0o--

# PRESBYTERY SUNG THUCHUAM CHUAM – Apr. 21

## 1. Teachers' Orientation:

Date 12<sup>th</sup> February 2021 ni chun Upa Tinkholam Moderator makai na'n Presbyterian Mission School(PMS), Tispari M/F ah John Calvin School leh PMS teacher te a ding Orientation nei ahi. Zia hun ahin ziltiltu(Resource Person) in

(i) Madam Mercy, *Asst. Prof. MU*

☞ *Topic: "Lesson Plan & Teachers-Students relationship"*

(ii) Madam Hoibetty, *Head Mistress VK Tawna High*

☞ *Topic: "Classroom management & effective communication skills"*

te pang in Programme chu kipak tak leh lawktak ah zaw/mat ahi.

## 2. Pastors Seminar:

Date 16<sup>th</sup> February 2021(Tuesday) ni khan KSP Office Session hall ah KSP Pastorten Seminar a nei ua, Resource person ah Rev. Laldawngliana, former Moderator leh Administrative Secretary PCI. mat ahi. Seminar thupi chu "Church and District Administration of Pastor" ti ahi. Paper zil zaw ahi in dawtna leh holimkhawmna nuam tak ah mat ahi. Lim kilak khawmna leh nitak annekna nei in hun matzaw ahi.

## 3. Upate Seminar:

A chung ah Seminar tho hi KSP. kochuam Upate a ding in a chuam ah Date 26<sup>th</sup> March 2021 (Friday) nin kochuam upa tam-tak chiakhawm in Head Quarters Church, Tuibuang biakin ah nei ahi. Resource person in Rev. S.T. Kaia Vaiphei, Executive Secretary leh Rev. Haulalven, Bialtu Pastor Town District mat ahin, amau hin genkhawm ding point/holimna ding point a hun guanggal ua ziate chu genkhawm in hun nuam tak ah mat ahi. A hung pang upate TE/DA piak ahiu a, lim kilakkhawmna nei in nitak annek khawmna nei in lawk tak ah hun mat ahi.

**4. Rev. Pauneithang ordination:**

Pro. Pastor Pauneithang @ Pauboi chun a probationary period kum thum, pastor training hun sung chu phatak ah a chai tak ziak in Synod ah Pastor piting ah siam ding ah dawtna siam ahi dungzui in 44<sup>th</sup> Manipur Presbyterian Church Synod Annual Session Lamka Chhim ah Date 14<sup>th</sup> February 2021 ah um a chun Pastor piting ah siam ahi tai. Tuhin Rev. Pauneithang @ Pauboi ti ahi tai. Date 7<sup>th</sup> March 2021 (Sunday) ni khan Kangvai Biakin ah induction (kawi-detna) hun Synod in a mang hi.

**5. Posting of Rev. Pauneithang:**

Khuga Sadar Presbytery guatna dungzui in tuhin Rev. Pauneithang hi Khuga District Bialtu Pastor ahi ta, Khuga District Pastor Quarters lua in Kangvai in a um hi.

**6. Posting of Rev. Thanglianmang:**

Rev. Thanglianmang hi Khuga Sadar Presbytery 63<sup>rd</sup> Annual Session guanggalna dungzui in Manipur Presbyterian Church Synod Executive Secretary hi ding in Kangvai a pat Synod in a kichawnlut ta, Date 1<sup>st</sup> March 2021 (Monday) a pat Synod Executive Secretary hina charge a la pan tai.

**7. Session Hall Iron Chair Chawk:**

Date 23<sup>rd</sup> February 2021 (Tuesday) nin Office Session Hall a ding Iron Chair – 28 chawk ahin, Sum ₹ 58,388/- sen ahi. Zia chu KSP. 3<sup>rd</sup> Standing Committee, Date 22<sup>nd</sup> March 2021 (Monday) nin Moderator guatna dungzui in Senior Pastor Rev. Tongtinthang in latna a nei hi.

**8. Tispari School Lam:**

Presbyterian Mission School, Tispari a ding in Bench – 20, Desk – 20 leh Table -4, siam zaw ahi ta, Date 20<sup>th</sup> February 2021 ni khan thaklut ahi tai. Chuleh class sung ah white Board-6 le siam zaw hi in a mang pan tau. Tukum hin Pathian zal in school naupang

le 80 val I nei tau a, Syllabus (Subject) hi John Calvin Academy a tawh kibang mat sak ahi ta, chu uniform le Kanglatongbi Bazar Tailoring ah Parent ten a ki- order ziang thei ding ua kibawl piak ahi tai. Uniform chung ah bel ding School logo le siam piak ahin, Chuleh Exercise book le PMS Tispari leh Tonglon D' school a ding siam in a school gel ua piak ahi tai.

#### 9. **M & E. Khawmpi Report:**

Date 12<sup>th</sup>- 14<sup>th</sup> March 2021 sung khan 18<sup>th</sup> Mission and Evangelism Khawmpi – 2021 chu Saipum Presbyterian Church ah “Mi tamtak in hinna a neina ding ua” ti thupi mang in lawktak ah mat zaw ahi tai. Tuchung hi speaker in Rev. S.T.Kaia Vaiphei, Executive Secretary, KSP. mat ahia, ama le Pathian in a mangcha sermon tuitak leh thanuam tak in a mang a, ngaithatuten a phatchuampi ma mau hi. Date 13<sup>th</sup> Feb. 2021(Sat.) ni khan Pathian Prog. ah thinan ei sukbuai ziak in zinglam kikhawpna kichawl maleh nitak kikhawpna phatak in sukzawm ahia, tuchung khawmpi chu a pit-ing ah a hung pangte lawting a kisa chiat ui. Bawmzawna sum ₹ 91,916/- mu ahin, ginna thutiam ah a pet pet in ₹ 32,560/- mu ahin, thasin pe ding ah kitiam chu ₹ 46,750/- ahin, chuleh tukum sung ah pe ding ah kitiamte kitiamna chu ₹ 80,950/- ahin, chun khawmpi thawlawm in ₹ 10,915/- mu ahi.

#### 10. **Cachar Field Biakin Sak:**

Tuhin Cachar Field biakin sakna a chia tha zing a, a foundation siam zaw ahi ta, tulai tak hin a thing ding kinawt mam lai tak ahia, zia zaw tak chuleh a in sak hi M & E Committee memberte kuan ah nikhat thu ah tundaw ziang ding ah guanggal ahi. Phatak ah zaw ahi theina ding in I pauchapnau in hechiat hi tiu.

#### 11. **Sum Matna Lam:**

Bank ah dan thak a hung pawt a, Bank a pat sum ₹ 20 lakhs I lakdaw tak leh I account a pat sum a la kikak sek a, zia chu TDS

(Tax deduction at source) a tiu a, eimau KSP sum le ₹ 50,000/- (Singnga) val a la kikat ta, Katlo theina ding lampi ngaitua hi-maleh lamdang (means) a um lo ziak in Finance Committee chu ngaitua in, zia chu Standing ah tut in thupukna chu bank him him ah sum in cash ah lakdaw tak lo ding cheque a le lakdaw lo ding, l piak dingte account a chun thun piak ding ti ahi dungzui in March-2021 thalaw a pat semtute thalaw le a bank account chiat ua thun piak ding ah phasak ahi tai.

### **12. PWF(KSP) Revival Khawmpi 2021:**

A hung tung ding date 16<sup>th</sup>- 18<sup>th</sup> April 2021, sung in Leilon Presbyterian Church ah Presbyterian Women Fellowship Revival Conference um ding ahin, Speaker ding in Evan. Kamthang hi ding ahi. A tam thei pen ah chiakhawm hitiu in, khawmpi lawtin theina ding in pauchapan hechiat hi tiu.

### **13. Synod Bible School:**

A hung tung ding Date 16<sup>th</sup> April 2021 (Friday) leh 8<sup>th</sup> Batch Synod Bible School (Certificate of Theology) course chu kipan kit ding ahi ta, eimau KSP Quota mi – 15 piak l hiu a, a kai nuamten KSP Office ahiloleh Synod office ah min khum thei ahi. Admission fee ₹ 500/- hi ding ahin, zia chu ama umna kochuamten a puakdaw piak ding ahi. Chuleh lekhabu man ₹ 300/- hi student ten a kipuakdaw ding uh ahi. Subject- 8 a um a, Subject pakhat a hin lecture 10 chiat a um hi. Class hi Thursday (Ningani) sin leh kinei sek ahi. Nikhat ah period- 4 kila sek ahi.

--o0o--

## 'DAMNA AW' PHUNGVUKTUTE :

### PATRON MEMBERS :

- |                       |                               |
|-----------------------|-------------------------------|
| 1. Pu P. Vaiphei IAS, | Imphal                        |
| 2. Upa Henthianthang, | S.Kotlian                     |
| 3. T.Upa Haulallawm   | S.Kotlian                     |
| 4. Upa Thienkhomang   | S. Kotlian                    |
| 5. Upa Laltinkhup,    | HQ. Church, Tuibuang          |
| 6. Pi Manliankim,     | HQ. Church, Tuibuang          |
| 7. Upa D. Mina,       | Lingsiphai                    |
| 8. T.Upa Ph. Gena,    | Lingsiphai                    |
| 9. Pu. Khamlal        | Saipum                        |
| 10. Pu Khamliankap    | Saipum                        |
| 11. Pu. Tinlunlal     | Saipum                        |
| 12, Pu. S.Kapbawi     | New Delhi                     |
| 13. Upa Genhau        | Central Church, Compound veng |
| 14. Pu. Khailianbawi  | Central Church, Compound veng |
| 15. Pi Kimtawi        | Kohima                        |
| 16. Tv. Daniel        | Tangmual                      |

### MEMORIAL GIFT :

- |                                |  |
|--------------------------------|--|
| 1. Pi Deem Melody,             | <b>Central Church, (Rengkai)</b><br><i>[In loving memory of (L) Upa Lamthianlal]</i> |
| 2. Pi Rebekah                  | <b>Kangvai</b><br><i>[In loving memory of (L) Pastor Khaivung]</i>                   |
| 3. Upa Liansomthang            | <b>Lingsiphai</b><br><i>[In loving memory of (L) Pu. Henzagen]</i>                   |
| 4. Pi. Nem Grace Boisi Capvung | <b>Delhi</b><br><i>[In loving memory of (L) Pi Vanlalchhuangi]</i>                   |

### SUPPORTING MEMBERS :

- |                           |                 |
|---------------------------|-----------------|
| 1. Upa Khomlunlal         | S.Kotlian,      |
| 2. Pu. S.Thangminlian     | Lingsiphai,     |
| 3. Pu Lelboi,             | Lingsiphai      |
| 4. T.Upa Lalneilian       | Central Church, |
| 5. Pu EL Soson            | Central Church  |
| 6. T.Upa Genminthang,     | Central Church, |
| 7. Pi. Kimneihawi         | Saipum          |
| 8. T.Upa J. Mark          | Saipum          |
| 9. Pu Genthiankap,        | Nghathal        |
| 10. Pu Lianzakhup         | Nghathal.       |
| 11. Pu Lemthang           | L. Mission Veng |
| 12. Rev. S.T.Kaia Vaiphei | Nghathal        |
| 13. Nk. Dimkhoniang       | Zikpi Tampak    |

**ENCOURAGING MEMBERS :**

- |                   |                 |
|-------------------|-----------------|
| 1. Pu K. Minlian  | Tangmual,       |
| 2. Upa Ph. Kamlam | L. Champhai,    |
| 3. Upa S.T.Siam,  | L. Mission Veng |
| 4. Pi Chhungi     | Hq. Tuibuang    |

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazal i hiu a, kuale phungvukna bawl utte a ding in bangtik lai in le bawlthei zing ahi.

**(i). Patron member- Kum 3 (three) a ding in. ₹. 3,000/-**

**(ii). Memorial Gift- Kum 2(two) a ding in. ₹. 2,500/-**

**(iii). Supporting member- Kum2(two) a ding in ₹. 2,000/-**

**(iv). Encourager- Kum 1(one) a ding in. ₹. 1,000/-**

Chun, sum thawt nuamte a ding in:

**A/C name: Khuga Sadar Presbytery(MPCS)**

**A/C nos: 32483318505**

**Branch code: 6182, CCpur**

**CIF nos: 86412486695**

**IFSC nos: SBINOOO6182.**